

ЎЗБЕКИСТОН РЕСПУБЛИКАСИДА ЛИЗИНГ МУОМАЛАЛАРИ ҲИСОБИ ВА АУДИТИНИ
ТАКОМИЛЛАШТИРИШ

Баҳадиров Алишер Комилович –
Тошкент давлат иқтисодиёт университети
мустақил изланувчиси

Аннотация: Ушбу мақолада Лизинг корхоналарида лизинг муомалалари ҳисоби ва унинг аудитини ўтказиши тартиблари ўрганиб чиқилган ва асосий маълумотлар кўрсатиб ўтилган.

Калит сўзлар: лизинг, лизинг субъектлари ва объектлари, лизинг муомалалари ҳисоби, аудит, асосий восита, амортизация.

СОВЕРШЕНСТВОВАНИЕ АУДИТА И УЧЕТА ЛИЗИНГОВЫХ ОПЕРАЦИЙ
В РЕСПУБЛИКЕ УЗБЕКИСТАН

Баҳадиров Алишер Комилович -
Соискатель Ташкентского государственного
экономического университета

Аннотация: В статье исследуется аудит и учет лизинговых операций в лизинговых компаниях, а также приводится основная информация.

Ключевые слова: лизинг, субъекты и объекты лизинга, учет лизинговых операций, аудит, основные средства, амортизация.

Bakhadirov Alisher Komilovich -
Researcher of Tashkent State University of Economics

DEVELOPMENT AUDIT AND ACCOUNTING OF LEASING OPERATIONS
IN THE REPUBLIC OF UZBEKISTAN

Annotation: This article examines audit and accounting of leasing operations in leasing companies, and provides basic information.

Keywords: lease, subjects and objects of lease, account of leasing operations, audit, fixed assets, depreciation.

Кириш. Мамлакатимизда лизинг муомалаларини такомиллаштириш учун унинг бу соҳадаги камчиликлари ва унга бериладиган янгиликлардан келиб чиққан ҳолда бу мавзуга биз кенгроқ ёндашдик. Лекин бу масалани кўриб чиқишдан олдин биз озгина лизингни ўзи тўғрисида фикрга эга бўлиш учун лизинг тушунчасига тўхталиб ўтамиз. Лизинг муносабатларини ривожлантириш мақсадида бизнинг республикамизда Молия Вазирлигининг 11 май 2009 йилда 54-сонли буйруғига асосан “Бухгалтерия ҳисобида ижара операцияларини акс эттириш тартиби тўғрисида”ги Низом ва “Ижара ҳисоби” буйича 6-сонли Бухгалтерия Ҳисоби Миллий Стандарти ишлаб чиқилди.

Президентимиз Шавкат Мирзиёев томонидан тасдиқланган 2017–2021 йилларда Ўзбекистон Республикасини ривожлантиришнинг бешта устувор йўналишлари бўйича Ҳаракатлар стратегиясида “Лизинг ва бошқа молиявий хизматларнинг ҳажмини уларнинг янги турларини жорий қилиш ва сифатини ошириш ҳисобига кенгайтириш” масаласининг қўйилиши ўта долзарб эканлигини белгилаб беради [1].

Лизинг (молиявий ижара) ижара муносабатларининг алоҳида тури бўлиб, унда бир тараф (лизинг берувчи) иккинчи тарафнинг (лизингга олувчининг) топшириғига биноан учинчи тарафдан (сотувчидан) лизинг шартномасида шартлашилган мол-мулкни (лизинг объектини) мулк қилиб сотиб олади ва уни шу шартномада белгиланган шартларда ҳақ эвазига эгалик қилиш ва фойдаланиш учун лизингга олувчига ўн икки ойдан ортиқ муддатга беради.


Тадбиркорлик фаолияти учун фойдаланиладиган истеъмол қилинмайдиган ҳар қандай ашёлар, шу жумладан корхоналар, мулкый комплекслар, бинолар, иншоотлар, ускуналар, транспорт воситалари ҳамда бошқа кўчар ва кўчмас мулк лизинг объектлари бўлиши мумкин.

Ер участкалари ва бошқа табиий объектлар, шунингдек муомаладан чиқарилган ёки муомалада бўлиши чекланган бошқа мол-мулк лизинг объектлари бўлиши мумкин эмас.

Лизинг берувчи, лизинг олувчи ва сотувчи лизинг субъектларидир. Лизинг шартномаси бўйича лизинг олувчига келгусида топшириш мақсадида лизинг объектини мулк қилиб олувчи шахс лизинг берувчи деб эътироф этилади.

Эгалик қилиш ва фойдаланиш учун лизинг шартномаси бўйича лизинг объектини олаётган шахс лизинг олувчи деб эътироф этилади. Лизинг берувчи лизинг объектини кимдан олаётган бўлса, шу шахс сотувчи деб эътироф эти-

лади. Лизинг объекти лизинг олувчининг кредити (қарзи) ҳисобидан олинган тақдирда, аниқ лизинг объектига нисбатан лизинг берувчининг кредитори ва лизинг олувчи бир шахс тимсолида иш кўришига йўл қўйилмайди.



1-расм. Янги лизинг битимлари сонининг ўсиш динамикаси

Манба: муаллиф ишланмаси

2020 йилнинг I-чорагида лизинг битимларининг сони кескин камайди, 4093 ни ташкил этди. 2019 йилнинг I-чорагига нисбатан лизинг битимлар 21,3% ёки 1109 та битимга камайди. Бу ҳолат дунёнинг барча мамлакатларида пан-

демияга қарши курашиш чора тадбирлари билан боғлиқ инқироз билан боғлиқ бўлиб қолди. Лизинг бозори иштирокчилари ўртасида лизинг битимларининг ўсиш ҳажми қўйидагича тақсимланган:

Жадвал

Лизинг бозори иштирокчилари ўртасида лизинг битимларининг ўсиш ҳажми [6]

Йиллар	Лизинг компаниялар		Банклар		Жами
	Мулк қиймати, млрд.сўм	Улуши %	Мулк қиймати, млрд.сўм	Улуши %	
2015	668,2	78,5%	183,0	21,5%	851,2
2016	630,8	64,8%	342,3	35,2%	973,1
2017	963,8	62,0%	589,8	38,0%	1 553,6
2018	1 912,2	72,6%	722,2	27,4%	2 634,4
2019	2 539,4	90,8%	256,6	9,2%	2 795,9
I-2020	1 035,2	88,8%	131,0	11,2%	1 166,2

90-йилларнинг биринчи ярмида бозор ислохотлари натижасида банк, кредит муассасалари ва корхоналар илгари иқтисодиётимизда қўлланилмаган кўпгина молиявий дастаклардан фойдалана бошладилар. Айни шу йилларда лизинг тузилмаларини фаол ташкил этиш, иқтисодиётнинг ушбу соҳасига инвестицияларни жалб қилиш, лизинг муносабатларининг ҳуқуқий асосларини шакллантириш бошланди.

Лизинг жараёнининг иккинчи босқичида икки ёки уч томонлама шартномада лизинг битимидаги барча мунозарали шартлар юридик жиҳатдан асосланади. Шунингдек, қуйидагилар расмийлаштирилади:

1. Лизингга олинадиган ускуна (мулк) олди-сотди битими;

2. Уни фойдаланишга олганлик далолатномаси; лизинг шартномаси;

3. Лизингга берилаётган ускуна, техника (лизинг мулки)га техника хизмат кўрсатиш ҳақида битим.

Лизинг жараёнининг учинчи босқичи анча маъсулиятли ҳисобланади. Ва лизинг мулкидан фойдаланиш даврини қамраб олади. Унда барча лизинг операциялари бўйича бўйича ҳисобкитоби ва ҳисобот олиб бориш, лизинг берувчига лизинг тўловларини беришни амалга ошириш, лизинг муддати ўтгач лизинг мулкидан келгусида фойдаланиш масаласини расмийлаштириш кўзда тутилади.

Лизинг шартномаси иштирок этувчи томонларнинг муносабатлари акс этадиган асосий ҳужжат ҳисобланади. У лизинг берувчи ва лизинг олувчи ўртасида тузилади ва унда лизинг мулки ишлаб чиқаришда фойдаланиш учун берилиши кўрсатилади. Лизинг шартномаси лизинг объекти фойдаланишга берилгани ва кўрсатилган муддат мобайнида ишлашлиги си-

фатида лизинг мулки қабул қилингани тўғрисидаги далолатнома имзоланган вақтдан кучга киради. Мулкнинг қабул қилинганлиги тўғрисида далолатнома лизинг олувчи томонидан расмийлаштирилади, лизинг шартномасини унда қатнашувчи барча томонлар имзолайди, яъни лизинг берувчи, лизинг олувчи, етказиб берувчи лизинг мулкни ишлаб чиқарувчи.

Лизинг мулки фойдаланишга олинганлиги тўғрисида далолатнома имзолангач ва расмийлаштирилгандан сўнг, лизинг берувчи лизинг олувчи олдида маъсулиятга эга бўлмайди, чунки у олинган лизинг мулкидан мустақил равишда фойдаланади.

Бизнинг фикримизча, лизинг мулкидан фойдаланиш жараёнида юзага чиқадиган ва синиш, йўқолиш, муддатидан олдин ишлаб чиқиш, бузилиш ва шикастланиш билан боғлиқ барча рискларни, етказилган зарардан қатъий назар, лизинг олувчи ўз зиммасига олиши керак.

Адабиётлар таҳлили. Халқаро Бухгалтерлар Федерациясининг уюшган аъзоси бўлган Ўзбекистон бухгалтерлар ва аудиторлар миллий ассоциацияси Халқаро аудит стандартларини давлат тилига таржима қилиш ва чоп этириш ҳуқуқини кўлга киритди. Халқаро Бухгалтерлар Федерациясининг расмий ружсати билан Ўзбекистон Молия Вазирлиги ҳамкорлиги ва кўмагида ўзбек тилидаги 2013 йил ҳолатида чоп этилган 3 томдан иборат “Сифат назорати, Аудит, Кўриб чиқиш, Бошқа ишонч билдириш ва Турдош хизматларнинг халқаро стандартлари” тўпламининг нашр этилиши бу борадаги муҳим кадам бўлди [2].

Лизинг муомалаларини қуйи шаклларини пайдо бўлиши ва ташкил топиши бир неча асрлик тарихга бориб тақалсада, лизинг бизнесининг замонавий тизими 50-60 йиллардан бошлаб ривожлана бошлаган эди. Унинг ижтимоий-иқтисодий аҳамияти илмий адабиётларда дастлаб XX асрнинг 70-80 йилларида кенг ёритила бошланди.

Тадқиқот методологияси. Тадқиқот ишида умумметодологик усуллардан-кузатиш, умумлаштириш, гуруҳлаш ва таққослаш каби усуллар қўлланилган.

Таҳлил ва натижалар муҳокамаси. Ўзбекистон бухгалтерия ҳисобининг миллий стандартлари тизими бухгалтерия ҳисоби халқаро стандартлари бўйича тузилган. Бунда “Молиявий ҳисоботни тақдим этиш”нинг 1-халқаро стандартга Ўзбекистон Республикаси «Молиявий ҳисоботни тайёрлаш ва тақдим этиш учун концептуал асос» БҲМС ва 1-сонли «Ҳисоб сиёсати ва молиявий ҳисобот» БҲМС стандартлари мос келади, молиявий лизингни тартибга солувчи қолган уч халқаро стандартлар миллий амалиётда 5-сонли «Асосий восита-

лар» ва 6-сонли «Ижарани ҳисобга олиш» БҲМС бухгалтерия ҳисоби стандартлари мувофиқдир.

Ижарага берувчида (лизингга берувчида) молиявий ижара бўйича операцияларнинг ҳисоби бухгалтерия ҳисобида қуйидагича акс эттирилади:

а) молиявий ижара объектлари уларни харид қилиш билан боғлиқ бўлган солиқлар ва бошқа мажбурий тўловлар суммасини қўшган ҳолда (агар улар қопланмаса) кирим қилинганда:

дебет капитал қўйилмаларни ҳисобга олувчи счётлар (0800);

кредит 6010 «Мол етказиб берувчилар ва пудратчиларга тўланадиган счётлар» ёки 6120 «Шўба ва қарам хўжалик жамиятларига тўланадиган счётлар» ёки турли кредиторларга бўлган қарзларни ҳисобга олувчи счётлар (6900) ёхуд бошқа тегишли счётлар;

Молиявий ижара объектларининг ижарага олувчига (лизингга олувчига) берилиши, агар берилаётган объект олдин фойдаланилмаган бўлса, бухгалтерия ҳисобида қуйидагича акс эттирилади:

дебет 0920 «Молиявий ижара бўйича олинган тўловлар» счёти;

кредит 9220 «Бошқа активларнинг чиқиб кетиши» счёти;

Мулкни молиявий ижарага бериш асосий фаолияти ҳисобланмаган корхоналарда ижарага олувчидан (лизингга олувчидан) ижара (лизинг) тўловларининг келиб тушиши бўйича операциялар бухгалтерия ҳисобида қуйидагича акс эттирилади:

а) ижара (лизинг) тўловлари жадвалига (тартибига) мувофиқ молиявий ижара бўйича олинган узоқ муддатли тўловларнинг жорий қисми ўтказилганда:

дебет 4810 «Молиявий ижара бўйича олинган тўловлар – жорий қисми» счёти;

кредит 0920 «Молиявий ижара бўйича олинган тўловлар» счёти;

б) молиявий ижара шартномаси бўйича ижарага олувчидан (лизингга олувчидан) пул маблағлари келиб тушганда:

дебет пул маблағларини ҳисобга олувчи счётлар;

кредит 4810 «Молиявий ижара бўйича олинган тўловлар – жорий қисми» счёти;

кредит 4830 «Олинган фоизлар» счёти;

в) ижара (лизинг) тўловлари жадвалига (тартибига) мувофиқ тўлов муддати етиб келмаган ижара (лизинг) тўловлари бўйича ижарага олувчидан (лизингга олувчидан) бўнак келиб тушганда:

дебет пул маблағларини ҳисобга олувчи счётлар;

кредит 6390 «Бошқа олинган бўнаклар» счёти;

г) ижара (лизинг) тўловлари жадвалига (тартибига) мувофиқ тўлов муддати етиб келганда, ижарага олувчидан (лизингга олувчидан) олдин олинган бўнақлар қоплашга (ҳисоблашга) олиб борилганда:

дебет 6390 «Бошқа олинган бўнақлар» счёти;

кредит 4810 «Молиявий ижара бўйича олинадиган тўловлар – жорий қисми» счёти;

кредит 4830 «Олинадиган фоизлар» счёти.

Молиявий ижара шартномаси бўйича олиб келинган молиявий ижара объектлари бухгалтерия ҳисобида қуйидагича акс эттирилади:

а) молиявий ижара объектларини ижарага олувчининг (лизингга олувчининг) бухгалтерия ҳисобида актив ва мажбурият сифатида тан олинадиган қиймати бўйича кирим қилиш:

дебет капитал қўйилмаларни ҳисобга олувчи счётлар (0800);

кредит 7910 «Тўланадиган молиявий ижара» счёти;

б) молиявий ижара объектларини белгиланган мақсади бўйича фойдаланиш учун яроқли ҳолатга келтириш билан боғлиқ бўлган харажатлар суммасига:

дебет капитал қўйилмаларни ҳисобга олувчи счётлар (0800);

кредит материалларни ҳисобга олувчи счётлар (1000), меҳнат ҳақи бўйича ходим билан ҳисоблашишларни ҳисобга олувчи счётлар (6700), суғурга ва давлат мақсадли жамғармаларига тўловлар бўйича қарзни ҳисобга олувчи счётлар (6500) ва бошқа тегишли счётлар;

в) молиявий ижара объектларини бошланғич қиймат бўйича фойдаланишга топшириш (уларнинг асосий воситалар таркибига ўтказилиши):

дебет 0310 «Молиявий ижара шартномаси бўйича олинган асосий воситалар» счёти;

кредит капитал қўйилмаларни ҳисобга олувчи счётлар (0800).

Лизинг муомалалари бухгалтерия ҳисобини юритиш бўйича низомда юқоридаги бухгалтерия ҳисоби ёзувлари кўрсатилган. Бизнинг фикримизча, бухгалтерия ҳисобини такомиллаштириш учун Дт 0310 – «Узоқ муддатли ижара шартномаси бўйича олинган асосий воситалар» счётига субсчётлар очиш керак. Чунки лизинг олувчи корхона бир нечта хил асосий воситани лизингга олиши мумкин ва шу асосий воситалар бўйича бухгалтерия счётларида алоҳида олиб борилса, ҳар бир асосий восита бўйича тўлиқ ва аниқ ҳисоб юритилаётганини кўриш мумкин. Масалан, 0311 – «Узоқ муддатли ижара шартномаси бўйича олинган автомобиллар», 0312 – «Узоқ муддатли ижара шартномаси бўйича олинган асбоб–ускуналар», 0313 – «Узоқ муддатли ижара шартномаси бўйича олинган

бинолар» ва шу каби субсчётлар очилса, лизинг олувчи корхоналарда лизинг муомалаларини бухгалтерия ҳисобини юритишда такомиллашиш кўринади ва шу субсчётлар ишга солинса мақсадга мувофиқ бўлади [3].

Лизинг олувчининг лизинг тўловлари барча миқдори улар ишлаб чиқарган маҳсулот таннархига қўшилади. Лизинг битимини молиялаштириш учун сафарбар этиладиган кредитдан фойдаланганлик учун сарфлар миқдори лизинг берувчида лизинг хизмати таннархига қўшилади. Амортизацияга ажратиш масаласи лизинг берувчи ёки лизинг олувчи балансида ҳисобга олинадиган мазкур лизинг мулкига боғлиқ ҳолда ҳал этилади.

Лизинг бизнеси барқарор ривожланиши учун бизнинг мамлакатимизда лизинг битими қатнашчиларининг рискини тўғри баҳолаш ва минималлаштириш муҳим аҳамият касб этади. Лизингдан манфаатдор тайинли мижозларни лизинг берувчининг излаши лизинг битими тузиш бўйича ташкилий ишларнинг умумий мақсади ҳисобланади. Амалда лизинг битими тузиш ташаббуси, одатда, тайинли лизинг олувчи томонидан бўлади. У зарур мулкка эга бўлган етказиб берувчини мустақил танлайди ёки лизинг компаниясига ёки тижорат банкига етказиб берувчини топишда ёрдам беришни сўраб мурожаат қилади. Бундай ҳолда ускуна тури ва лизинг компанияси тавсия этганлардан бирини танлаш ҳуқуқини лизинг олувчи ўзида сақлайди.

Лизингга берувчининг рухсатисиз амалга оширилган лизинг объектини яхшилашга сарфланган маблағлар (қўйилмалар) ва уларни лизинг объектига зарар етказмаган ҳолда ажратиб олиш имконияти бўлмаса, лизинг шартномасининг амал қилиш муддати тугагач ёки шартнома бекор қилинган, лизингга берувчига текинга ўтади. Бироқ, агарда уларни лизинг объектига зарар етказмаган ҳолда ажратиб олиш мумкин бўлса ва агар лизингга берувчи уларнинг қийматини тўлашга рози бўлмаса, бундай ҳолларда лизингга олувчи уларни ўзига ажратиб олиши мумкин.

Молия вазирлиги Вазирлар Маҳкамасининг «Ўзбекистон Республикаси ҳудудида қўллаш учун аудитнинг халқаро стандартларини тан олиш тартиби тўғрисидаги низомни тасдиқлаш ҳақида»ги қарори лойиҳасини ишлаб чиқди. Лойиҳа 19.09.2018 йилдаги ПҚ–3946-сон қарорга мувофиқ ишлаб чиқилган, унга кўра 2020 йил 1 январдан бошлаб аудиторлик ташкилотлари аудиторлик фаолиятини фақат Халқаро бухгалтерлар федерацияси томонидан нашр этиладиган аудитнинг халқаро стандартлари асосида амалга оширадилар. Аудит бўйича халқаро стандартлар – бу аудиторлик фаолияти билан шуғулланиш учун халқаро профессионал

стандартлар ҳисобланади. Ушбу стандартлар Хатқаро аудит ва аттестация стандартлари Қўмитаси тарафидан ишлаб чиқилади. Халқаро аудит стандартлари ушбу бўлинмалардан иборатдир:

1.1. Кириш

1.2. 200-299 стандартлар. Умумий принцип ва мажбуриятлар.

1.3. 300-499 стандартлар. Хатарни баҳолаш ва аниқланган хавфларга қарши туриш.

1.4. 500-599 стандартлар. Аудиторлик далиллар.

1.5. 600-699 стандартлар. Бошқаларнинг хизматларидан фойдаланиш.

1.6. 700-799 стандартлар. Аудиторлик хулосалари.

1.7. 800-899 стандартлар. Махсус жихатлар [4].

Ўзбекистон Республикасининг барча мажбурий аудит ўтказилиши керак бўлган ҳўжалик юритувчи субъектлар 1 январ 2020 йилдан Халқаро аудит стандартлари асосида текширув ўтказилди ва ушбу стандартлар асосида аудиторлик хулосалари тақдим этилди. Лизинг корхоналарида лизинг муомалалари бухгалтерия ҳисобини аудит ўтказишда ушбу корхона молиявий ҳисоботларидаги кўрсаткичлар бирламчи ҳужжатларга асосланиб тўғри ва аниқ кўрсатилганлигига ишонч ҳосил қилиши лозим. Аудиторлик корхонаси тарафидан лизинг олувчи ва берувчи ўртасидаги шартнома ва ушбу шартнома бўйича кўрсатилган талаблар бажарилиши таҳлил қилиниши керак. Ва таҳлил натижасида лизинг шартномаларидаги ҳар бир кўрсатилган суммалар молиявий ҳисоботда акс эттирилганлигини аудитор кўриб ўтиши шарт.

Халқаро аудит стандартларига мувофиқ аудиторлик корхонаси текшириш бошланишидан олдин ушбу корхона билан муҳимлилик даражасини тасдиқлаб олиниши керак. Аудиторлик фаолияти тўғрисидаги қонуннинг (ЎРҚ 677 сонли 25 феврал 2021 йил) 35-моддасига асосан лизинг олувчи ва берувчилар ҳар йили мажбурий аудиторлик текширувидан ўтказилиши шарт эмас, лекин ҳисобот йили яқунларига кўра куйидаги шартлардан бир вақтнинг ўзида иккитасига жавоб берган тижорат ташкилотлари: активларининг баланс қиймати базавий ҳисоблаш миқдорининг юз минг баравари миқдоридан ортиқ, маҳсулотларни (ишларни, хиз-

матларни) реализация қилишдан олинган тушуми базавий ҳисоблаш миқдорининг икки юз минг баравари миқдоридан ортиқ, ходимларининг ўртача йиллик сони юз нафардан ортиқ бўлса, ушбу ҳўжалик юритувчи субъект ҳар йили мажбурий аудит ўтказилиши лозим.

Яна эътиборли жихатларидан бири, агар аудиторлик корхонасининг амалиётида лизинг шартномалари кўрилмаган ҳолда, ушбу корхона Халваро аудит стандартларига мувофиқ бошқа, яъни лизинг муомалари ҳисобини ва ҳисоботини юритилишини билган шахсларни жалю қилиши мумкин. Ушбу келишув асосида аудиторлик компанияси ва аудит ўтказилаётган корхона учун жуда ҳам муҳим ва аҳамиятли роль касб этади. Чунки корхона бухгалтерлари тарафидан берилган ҳар бир бухгалтерия ёзувлари тез ва аниқ текширилиб ўтилади.

Хозирга кунга келиб, кўпгина лизинг олувчи ва берувчи корхоналарда бухгалтерия программаси мавжуд ва ушбу программа орқали молиявий ҳисоботларни тузилиши ва бухгалтерия ёзувлари олиб борилади. Ушбу бухгалтерия программаси мавжуд корхоналарнинг бухгалтерия ҳисобини аудит ўтказишда жуда қулай ва тез амалга оширилади.

Хулоса ва таклифлар. Хулоса қилиб шуни айтиш мумкинки, лизинг муомалаларининг дастлабки ҳисоби амалиётини кўриб чиққанда, лизинг олиш учун кўпгина ҳужжатлар тайёрланиши кераклигини кўриб чиқдик. Лекин шу ҳужжатларни йиғиш учун анча вақт йўқотилади ва лизинг олувчилар учун ушбу вазият қийинроқ. Шунинг учун бизнинг фикримизча, айрим электрон ҳужжатлар лизинг жараёнида тақдим этилмаса бу Ўзбекистон Республикасининг ҳўжалик юритувчи субъектлар учун жуда осон ва қулай шароит яратиб берилган бўларди. Бундан келиб чиқиб, лизинг олиш учун ҳужжатлар сони камайтирилса, кўпгина корхоналар лизинг муомалаларидан фойдаланишни қўллаб-қувватлайдилар.

Лизинг олувчида лизинг ҳисобини юритилишида алоҳида субсчетлар очилса, ушбу вазият корхона раҳбарлари учун жуда қулай ва тезкор маълумот олишда ўз ўрнига эга булади. Шунинг учун лизинг олувчи корхоналарида бухгалтерия ҳисобини юритилиш бўйича Ҳисоб сиёсатида ушбу субсчетлар очилиши кўрсатиб ўтилиши мақсадга мувофиқ бўлади.

Манба ва фойдаланилган адабиётлар:

1. Ўзбекистон Республикаси Президенти Ш.Мирзиёевнинг "2017 — 2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини амалга оширишга доир ташкилий чора-тадбирлар тўғрисида"ги Фармойиши. (Ўзбекистон Республикаси қонун ҳужжатлари тўплами, 2017 й., 7-сон, 88-модда)
2. Сифат назорати, аудит, кўриб чиқиш, бошқа ишонч билдириш ва турдош хизматларнинг халқаро стандартлари тўплами, 2012, II қисм. - Т.: «Sano-Standard», 2014., 554 б.
3. Материал из Википедии — свободной энциклопедии <https://ru.wikipedia.org/wiki>
4. Бухгалтерия ҳисобида ижара операцияларини акс эттириш тартиби тўғрисида Низом (Ўзбекистон Республикаси молия вазирининг 2009 йил 11 майдаги 54-сонли буйруғи билан тасдиқланган)
5. Варонина Л.И. Аудиторская деятельность: основы организации. Учебно-практическое пособие. – М.: Эксмо, 2007. - 336 с.
6. Лизинговый сектор Узбекистана: Итоги 2020 года. Председатель «Лизинговой Ассоциации Узбекистана» Мустафаев З.Б.